

摘藻堂四庫全書薈要

集部

欽定四庫全書薈要

集部
宋詩鈔卷一

詳校官候選知縣臣吳爾華



欽定四庫全書薈要

宋詩鈔目錄

卷一

王禹偁

小畜集

卷二

徐鉉

騎省集

卷三

韓琦

安陽集



卷四

蘇舜欽

上

滄浪集

卷五

蘇舜欽

下

滄浪集

卷六

張詠

乖崖集

卷七

趙抃

清獻集

卷八

梅堯臣

上

宛陵集

卷九

梅堯臣

下

宛陵集

卷十

余靖

武溪集

卷十一

歐陽修

上

文忠集

卷十二

歐陽修

下

文忠集

卷十三

林逋

和靖集

卷十四

石介

徂徠集

卷十五

孔武仲

清江集

卷十六

孔平仲

清江集

卷十七

韓絳

南陽集

卷十八

王安石

上

臨川集

卷十九

王安石

下

臨川集

卷二十

蘇軾_上

東坡集

卷二十一

蘇軾_中

東坡集

卷二十二

蘇軾_下

東坡集

卷二十三

鄭俠

西塘集

卷二十四

王令

廣陵集

卷二十五

陳師道

後山集

卷二十六

文同

丹淵集

卷二十七

朱黻

襄陽集

卷二十八

黃庭堅_上

山谷集

卷二十九

黃庭堅_下

山谷集

卷三十

張耒_上

宛丘集

卷三十一

張耒_下

宛丘集

卷三十二

晁冲之

具茨集

卷三十三

韓駒

陵陽集

卷三十四

晁補之

雞肋集

卷三十五

鄒浩

道鄉集

卷三十六

秦觀

淮海集

卷三十七

陳造

江湖長翁集

卷三十八

沈遼

雲巢集

卷三十九

沈邁

西谿集

卷四十

沈與求

龜谿集

卷四十一

徐積

節孝集

卷四十二

陳與義

上

簡齋集

卷四十三

陳與義

下

簡齋集

金史卷之四十四
目錄
卷四十四

李覲

盱江集

卷四十五

王炎

雙溪集

卷四十六

唐庚

眉山集

卷四十七

孫覲

鴻慶集

卷四十八

張元幹

蘆川歸來集

卷四十九

葉夢得

建康集

卷五十

張九成

橫浦集

卷五十一

汪藻

浮溪集

卷五十二

范浚

香溪集

卷五十三

劉子翬

屏山集

卷五十四

朱喬年

韋齋集

卷五十五

朱松年

玉瀾集

卷五十六

程俱

北山集

卷五十七

吳儆

竹洲集

卷五十八

周必大

上

省齋集

卷五十九

周必大

下

平園續稿

卷六十

朱熹

文公集

卷六十一

范成大_上

石湖集

卷六十二

范成大_中

石湖集

卷六十三

范成大_下

石湖集

卷六十四

陸游

劔南集

卷六十五

陸游

劔南集

卷六十六

陸游

劔南集

卷六十七

陸游

劔南集

卷六十八

陸游

劔南集

卷六十九

陸游

劔南集

卷七十

陳傅良

止齋集

卷七十一

楊萬里

江湖集

卷七十二

楊萬里

荆溪集

卷七十三

楊萬里

西歸集

卷七十四

楊萬里

南海集

卷七十五

楊萬里

朝天集

卷七十六

楊萬里

江西道院集

卷七十七

楊萬里

朝天續集

卷七十八

楊萬里

江東集

卷七十九

楊萬里

退休集

卷八十

薛季宣

浪語集

卷八十一

葉適

水心集

卷八十二

林光朝

艾軒集

卷八十三

樓鑰

攻媿集

卷八十四

趙師秀

清苑齋集

卷八十五

翁卷

葦碧軒集

卷八十六

徐照

芳蘭軒集

卷八十七

徐璣

二薇亭集

卷八十八

黃公度

知稼翁集

卷八十九

劉克莊

後村集

卷九十

劉克莊

後村集

卷九十一

王廷珪

瀘溪集

卷九十二

劉宰

漫塘集

卷九十三

王阮

義豐集

卷九十四

戴敏才

東臯集

卷九十五

戴復古

上

石屏集

卷九十六

戴復古

下

石屏集

卷九十七

戴昺

農歌集

卷九十八

鄭震

清雋集

卷九十九

謝翱

上

晞髮集

卷一百

謝翹

下

晞髮續稿

卷一百一

文天祥

文山集

卷一百二

許月卿

先天集

卷一百三

林景熙

白石樵唱集

卷一百四

真山民

山民集

卷一百五

汪元量

水雲集

卷一百六

梁棟

隆吉集

臣等謹案宋詩鈔一百六卷

國朝吳之振編之振字孟舉石門人官內閣中

書是編以宋詩選本叢雜因蒐羅遺集共得
百家其本無專集及有集而所選不滿五首
者皆不錄每集之首繫以小傳畧如元好問
中州集例而品評考證其文加詳蓋明季詩
派最為蕪雜其初厭太倉歷下之剽襲一變
而趨清新其繼又厭公安竟陵之佻巧一變
而趨真朴故

國初諸家頗以出入宋詩矯鈎棘塗飾之弊之

振是選即成於是時以其人自為集故甫刊
一帙即摹印行世所傳之本往往多寡不同
此本有錄無書者尚有劉弇鄧肅黃幹魏了
翁方逢辰宋伯仁馮時行岳珂嚴羽裘萬頃
謝枋得呂定鄭思肖王柏葛長庚朱淑真十
六家蓋剝劓未竣故竟無完帙也近時曹庭
棟病其未備因又有宋人百家詩存之刻以
補其闕皆之振所未錄然之振於遺集散佚

之餘弣意蒐羅使學者得見兩宋詩人之崖
畧不可謂之無功與庭棟之書相輔而行固
亦如駮有蘄矣乾隆四十三年二月恭校上

總纂官

臣

紀昀

臣

陸錫熊

臣

孫士毅

總校官 臣 陸費墀

宋詩鈔序

自嘉隆以還言詩家尊唐而黜宋宋人集覆瓿糊壁棄之若不克盡故今日蒐購最難得黜宋詩者曰腐此未見宋詩也宋人之詩變化於唐而出其所自得皮毛落盡精神獨存不知者或以為腐後人無識倦於講求喜其說之省事而地位高也則羣奉腐之一字以廢全宋之詩故今之黜宋者皆未見宋詩者也雖見之而不能辨其原流則見與不見等此病不在黜宋而在尊唐蓋

所尊者嘉隆後之所謂唐而非唐宋人之唐也唐非其唐則宋非其宋以為腐也固宜宋之去唐也近而宋人之用力於唐也尤精以專今欲以鹵莽剽竊之說凌古人而上之是猶逐父而禰其祖固不直宋人之軒渠亦唐之所吐而不饗非類也曹學佺序宋詩謂取材廣而命意新不勦襲前人一字然則詩之不腐未有如宋者矣今之尊唐者目未及唐詩之全守嘉隆間固陋之本皆宋人已陳之芻狗踐其首脊蘇而爨之久矣顧復取

而篋衍文繡之陳陳相因千喙一唱乃所謂腐也譬之
膾炙翻故出新極烹芼之巧則為珍美矣三朝三暮數
進而不變臭味俱敗猶以為珍美也腐乎不腐乎故臭
腐神奇從乎所化嘉隆之謂唐唐之臭腐也宋人化之
斯神奇矣唐宋人之唐唐宋之神奇也嘉隆後人化之
斯臭腐矣廼腐者以不腐為腐此何異狂國之狂其不
狂者歟萬歷間李萊選宋詩取其離遠於宋而近附乎
唐者曹學佺亦云選始萊公以其近唐調也以此義選

宋詩其所謂唐終不可近也而宋人之詩則已亾矣余所選蓋反是盡宋人之長使各極其致故門戶甚博不以一說蔽古人非尊宋於唐也欲天下黜宋者得見宋之為宋如此其為腐與不腐未知何如而後徐議其合黜與否或繇是而疑此數百年中文人老學游居寢食於唐者不翅十倍後人何獨於嘉隆之說求一端之合而不可得因忽悟其所以然則是集也未必非唐以後詩道之巫陽也夫昔康熙辛亥仲秋之朔洲錢吳之振

書於鑑古堂

欽定四庫全書薈要卷二萬二百五十四

集部

宋詩鈔卷一

內閣中書舍人吳之振編

王禹偁小畜集鈔

禹偁字元之濟州鉅野人九歲能文太平興國八年進士授成武主簿徙知長洲縣端拱初召試擢右拾遺直史館拜左司諫知制誥坐劾妖尼貶商州團練使量移解州進拜左正言直弘文館出知單州尋召為

禮部員外郎再知制誥至道元年入翰林為學士知
審官院兼通進銀臺封駁司又坐謗訕罷為工部郎
中知滁州揚州召還知制誥又坐竇錄直書出知黃
州徙蘄州而卒年四十八今有小畜集六十二卷紹
興丁卯沈虞卿所編也當時元之自編按其序則三
十卷宋史言二十卷脫誤也元之詩學李杜故其贈
朱巖詩云誰憐所好還同我韓柳文章李杜詩學杜
而未至故其示子詩云本與樂天為後進敢期子美

是前身是時西崑之體方盛元之獨開有宋風氣於
是歐陽文忠得以承流接響文忠之詩雄深過於元
之然元之固其濫觴矣穆修尹洙為古文於人所不
為之時元之則為杜詩於人所不為之時者也

酬种放徵君一百韻

太歲在辛卯九月萬木落是時太陰虧占云臣道剝王
生出紫薇譴逐走商洛扶親又抱子迤邐過京索散車
載詩史病馬懸囊橐西都不敢住空負香山約閩鄉正

南路秦嶺峭如削肩輿碍巨石十步三四却妻孥亦徒
步磧礫不容脚山店蓋木皮烟火渾薰灼夜深聞贊虎
合家屢驚懼山泉何縈回切裂無橋約卸鞍引羸蹄解
襪事芒屨晨瀾髮可鑿朝涉脛如斲商山六百里天設
皆岩岬上洛在其中狴牢曾未若逐臣自可死何必在
遠惡刺史不我顧古寺聊淹泊卜居雜民氓致養無精
鑿知道由自寬有親強為樂側聞种先生終南卧雲壑
長沮既躬耕元禮仍開學王績婦未娶介潔翹孤鶴之

推母偕隱教誨修天爵詩情亦嗜酒道氣不服藥田衣

剪荷芰野飯烹菹葍霧豹澤文彩冥鴻避矰繳宥從羔

雁聘唯恐簪裾縛如何宋右史斥鷃議鵬鶚起居舍人宋維翰奏

种放隱居終南乞量才錄用頗為識者所笑玄纁與丹詔恩禮誠非薄仍勅

京兆府敦諭辭恭恪先生戀板輿純孝心堅確散髮走

烟巒拜章謝恩渥巨材猶在澗大玉不出璞使者遂空

回軟輪何寂寞賢母召徵君庭責詞嗚嗚胡為事章句

漏名入街郭府縣汚我山胥徒諫吾幄以茲近聲利安

得成高邈誓將徙窮谷庶可逃喧濁先生拜引過為壽
開樽杓陶陶又熙熙何啻聞竽籥人傳到遷客面目頓
慚作器小識不遠當年事頭角遭時得一第游宦何齷
齷逐羶甚虬蟬鬪耀同蝟螭宰邑乏絃歌諫垣無蹇諤
便番朱紫綬借忝絲綸閣方號駸駸龍已困狺狺狻待
罪始知非咄哉昧先覺一聆高世行罪髮庸可擢忍恥
賦三章塵埃寄一作寥廓明年會恩宥量移井蛙躍靡
暇謁南山征途望西嶽黃河波洶湧白徑苔班駁中條

圍解縣五老烟蟲蟲此馬為郡副烏敢事隕穫籠禽幸
未死尚且謀飲啄米呼村婢舂樵顧山童斫飼馬粹寒
蕪看書藝秋籜信口亦吟哦放心無適莫君恩已絕望
人事終難度相府一張紙喚起久屈蠖誠知有梁棟未
忍弃椽桷五城天上開三殿雲間卓重取故衣冠籠裹
山猿攫病翼得風雲壞墻勞楮堊諫官與史氏舊職聊
羈絡舉袖拂石螭凝眸睨金雀冥心想前事一夢何揮
霍長恐先生聞倚松成大喙關中朋友來遺我神仙作

繁華遠容綺錚鏦美金錯古澹吸劍羹大雅鏗木鐸千
言距百韻旨趣何綽綽孰念氣如虹翻然輕抵鵲俊甚
麻姑爪快比屠門嚼渾金豈在鎔尺璧寧施琢愈風齊
捧檄忘味同聞樂置之向懷袖日夕芬蘭若褒我塵俗
韻鉛刀化干莫同聲必有應過實還疑謔盛夸山中事
雲屋張霞幕蘭茝含露採石髓和烟酌巢由泉滌耳園
綺芝盈握有時上絕頂星斗近可摸下視塵世人營營
似蟲螻男兒既束髮出處岐路各苟非秉陶鈞即去持

予槩致主比唐虞安邊如衛霍不爾為逸人深居返吾
朴胡然自碌碌名節亦銷爍行年過半世功業無圭勺
無術鑄五兵使民興錢鏹無才統六師逐寇開沙漠空
言說王道肆目看人瘼多慚指佞草虛效傾心藿一覽
大雅文起予亦何博况茲山野性謨畫昧方略搔首謝
朝簪行將返耕鑿

寄題陝府南溪兼簡孫何兄弟

甲湖在陝服自昔名所重許昌擅唐律人口尚傳頌舊

迹固慕莽勝槩猶出衆前年謫商於過此方憂恐無暇
濯溪泉惻惻心甚痛量移遇恩宥方寸稍放縱故人孫
漢公勤懇事迎送柅車得三宿延我入溪洞春殘尚有
蝶夏首始見螻朱櫻實頗繁黃鳥聲亦哢地幽接府署
亭高瞰村壟縈砌水逶迤入簷山巖鯉翻自躍金蝸
篆燒餘汞石危君子介筍亂小人勇虓涼集鷗鷺爽塏
無蚊蠓芟葉巧如剪萍根密非種逕苔白斑駁岸草玄
翁奉官醞綠開瓶時果青出籠醉中猛別後依約似一

夢唯愁當要路時仗棲闌茸解梁雖近山坑塿費耕種
常風自監南日夕塵塼捧雲泉既遼遠草樹非秀聳况
茲炎蒸月繫縛何所動緬懷八龍會南溪與誰共撮萼
本多才甘棠應少訟枕簟與琴書鵠原聊自奉篇章取
李杜講貫本姬孔古文閱韓柳時策聞晁董清吹席上
來當暑開冰凍菱脆擘瓊枝瓜甘浮蜜甯氣秋綠篠戰
露覲圓荷捧照湖小賀監溪堂輕馬揔此景且不同此
懷可長慟平生好泉石况復官散冗近聞田紫微連水

許就俸

田舍人量移軍州表乞就漣水居詔許之

援例苟得請甲湖當日用

終老占溪居卧看秋泉湧

七夕

商州作

去年七月七直廬開獨坐西日下紫垣東窓昏青瑣露
柳蛩忽鳴風簾燕頻過寂寂紅藥堦槿花開一朵時清
無詔誥性淡忘物我兀然何所營橫枕通中卧夢入無
何鄉蛺蝶甚么麼孰謂處深岩自得放慵情中官傳宣
旨御詩令屬和驚起儼衣冠拜舞蒼苔破逸翰龍蛇走

雅調金石播洋洋治世音乃賡強牽課暮隨丞相出自
謂天上墮歸來脩乞巧酒肴間瓜果海物雜時味羅列
繁且夥家人樂熙熙兒戲舞娑娑寵辱方若驚倚伏忽
成禍九月謫商於羈縻伏窮餓鳳儀因鷓嚇驥足翻驚
跛山城已僻陋旅舍甚叢脞夏旱麥未死春霜花木挫
吾親極衰耄吾命何軼軻稚子啼我前孺人病我左玄
髮半凋落紫綬空垂拖客計魚脫泉年光蟻旋磨昨夜
枕簟涼西郊忽流火河漢勢清淺牛女姿婀娜商土本

磽确商民久勞瘁霜旱固不支水潦復無奈今歲商山秋大水

居人且艱食行商不通貨郡小數千家今夕惟愁呵吾

兒索來禽即林擒傾市得一顆舉家成大笑愁眉略舒臆

自念一歲間榮辱兩偏頗賴有道依據故得心安妥窮

乎止旅人達也登王佐匏瓜從繫滯糠粃任揚簸批鳳

不足言失馬聊自賀委順信吾生無可無不可

不見陽城驛 并序

予為兒童時覽元白集唱和陽城驛詩時稔貶江陵

過商山感陽道州而作是詩也且改驛為避賢郵不
忍呼其諱也樂天在翰林得而和之又見杜紫微富
水驛詩題下解云富水驛舊名與陽諫議同卒章曰
驛名不合輕移改留警朝天者惕然淳化二年九月
予自西掖左宦商於訪其驛則無有也檢之圖經求
之郡境則富水地存而驛廢陽城之號遂莫知矣因
作古風詩申明三賢之作且以不見陽城驛為首句
至于道州之行事元詩盡之矣此不復云

不見陽城驛空吟昔人詩誰改避賢郵唱首元微之微
之謫江陵顛顛為判司路道商山驛一夕見嗟咨所嗟
陽道州抗直貞元時時亦被斥逐南荒終一麾題詩改
驛名格力何高竒樂天在翰林亦和遷客詞遂使道州
名光與日月齊是後數十年借問經者誰留題富水驛
始見杜紫微紫微言驛名不合輕改移欲遣朝天者惕
然知在茲一以諱事神名呼不忍為一以名警衆名存
教可施為善雖不同同歸化之基邇來又百稔編集空

鱗差我遷上洛郡罪譴身繫維舊詩猶可誦古驛殊無
遺富水地雖在陽城名豈知空想數君子貫若珠纍纍
三章詩未泯千古名亦垂德音苟不嗣吾道當已而前
賢尚如此今我復何悲題此商於驛吟之聊自怡

感流亡

謫居歲云暮晨起厨無煙賴有可愛日懸在南榮邊高
春已數丈和暖如春天門臨商於路有客憇簷前老翁
與病嫗頭髻皆皤然呱呱三兒泣惇惇一夫鰥道糧無

斗粟路費無百錢聚頭未有食顏色頗饑寒試問何許
人答云家長安去年關輔旱逐熟入穰川婦死埋異鄉
客貧思故園故園雖孔邇秦嶺隔藍關山深號六里路
峻名七盤襁負且乞丐凍餒復險艱惟愁大雨雪殫死
山谷間我聞斯人語倚戶獨長歎爾為流亡客我為冗
散官在官無俸祿奉親乏甘鮮因思筮仕來倏忽過十
年我冠蠹黔首旅進長素餐文翰皆徒爾放逐固宜然
家貧與親老覩爾聊自寬

竹龜

商嶺多修篁蒼翠連山谷有鼠生其中薦食無厭足春
筍齧生犀秋筠折寒玉飫飽致肥腴優游恣蕃育林密
鳶不攫穴深犬難逐鳳皇餓欲死彼實無一掬唯此竹
間龜琅玕長滿腹暖戲綠叢陰舉頭傲鴻鵠不知商山
民愛爾身上肉有鍤利其鋒有錐鋸于鏃開穴窘如囚
洞胸聲似哭膏血尚淋漓攜來入市鬻竹也比賢良鼠
兮類商俗所食既非宜所禍誠知速吁嗟狡小人乘時

竊君祿貴依社樹神俸盜太倉粟笙簧佞舌鳴藥石嘉
言伏朝見秉大權夕聞罹顯戮李斯具五刑趙高夷三
族信有司殺者在暗明如燭彼狡無害賢彼鼠無食竹
送筇杖與劉湛然道士

有客遺竹杖九節共一枝鶴脰老更長龍骨乾且竒我
問何所來來從西南夷因思漢武帝求此民力疲明明
聖天子德教加四維蠻夷盡臣妾縣道皆羈縻僉與
笮馬入貢何累累此竹日以賤輕視如蒿藜我年三十

七血氣未全衰况在紫微垣動為簪笏羈倚壁如長去聲
物歲月無所施寸心空愛惜惜此來天涯忽承明主詔
來謁太乙祠再見劉先生氣貌清且羸持此以為贈所
謂得其宜少助橘童力好引花鹿隨步月莫離手看山
聊搯頤微物懶致書故作筇竹詩

對雪

帝鄉歲云暮衡門晝長閉五日免常參三館無公事讀
書夜卧遲多醒日高睡睡起毛骨寒窓牖瓊花墜披衣

出戶看飄飄滿天地豈敢患貧居聊將賀豐歲月俸雖
無餘晨炊且相繼薪芻未闕供酒肴亦能備數杯奉親
老一酌均兄弟妻子不饑寒相聚歌時瑞因思河朔民
輸挽供邊鄙車重數十斛路遙數百里羸蹄凍不行死
轍冰難曳夜來何處宿閒寂荒陂裏又思邊塞兵荷戈
遇敵騎城上卓旌旗樓中望烽燧弓勁添氣力甲寒侵
骨髓今日何處行牢落窮沙際自念亦何人偷安竟如
是深為蒼生蠹仍尸諫官位謬諤無一言豈得為直士

褒貶無一詞豈得為良史不耕一畝田不持一隻矢多
慚富人術且乏安邊議空作對雪吟勤勤謝知己

送朱九齡

吏隱不求貴親老不擇祿之子有俊才弱冠中正鵠弗
墜先人業何慚有道穀一命佐碭山枳棘聊容足再命
宰嘉興絲桐幾易俗率身甘菜茹養母求梁肉承顏苟
不虧折腰未為辱解印無餘貲舟中只琴筑十口寄淮
泗一身來輦轂又說東南行秋風江水淥鄱陽古名郡

赤金流山谷每歲鼓錢刀從來設官局還得便高堂無
辭縻逸躅颺帆江湖思木脫天地肅楓葉紫爛蓼花
紅眾歛津吏曉來迎溪僧夜留宿至止事方簡優游從
所欲江城豐稻梁水市多魚菽三載奉甘飴百錢飽家
族自有綵衣華勿嘆藍袍綠行年未三十氣壯顏如玉
行義日以聞焉能長碌碌終列侍臣班耀我同年錄且
賦白華詩唱作離筵曲

暴富送孫何入史館

孟郊嘗貧苦忽吟不貧句為喜玉川子書船歸洛浦郊

有忽不貧喜盧全書船歸洛詩

乃知君子心所樂在稽古漢公得高科

不足惟墳素二年佐棠陰眼黑怕文簿躍身入三館爛
目閱四庫孟貧昔不貧孫貧今暴富暴富亦須防文高
被人妒

送馮尊師

時馮再為拾遺

前日訪潘閭下馬入窮巷忽見雙筍石卧向青苔上云
是馮尊師秋來留在茲今說東南行問我堅乞詩又見

宋閣老亦言詩甚好欲去天台山即別長安道臺閣有
羣英贈別瑰與瓊琤然滿懷袖此事殊為榮安用徵吾
句吾道方齟齬老為八品官有山未能去束髮號男兒
出處貴得宜出則學臯夔獨立稱帝師處則同喬松決
起如冥鴻誰能似蚯蚓蟠屈泥土中師行甚可羨雲鶴
無羈絆為我持此詩題于桐栢觀

庶子泉

物趣固天造物景不自勝泉乎未遇人石罅徒流迸宮

相政多暇行樂躡岩磴發蒙漲為溪幽致茲焉盛唐賢
大厯後峭壁刻名姓我來一何暮今秋始乘興山勢環
有缺山門壺引柄乍挹清泚香頗愜幽閒性味將春茗
宜光與曉嵐暝架竹落僧厨遠聲入晴磬何當宿禪室
欹枕終夜聽飲多病骨換照久塵襟迥銷盡謫居愁無
心治歸艇

陽水篆

冷冷庶子泉落落陽水筆雲氣勢奔垂龍蛇互蟠屈嶧

山既劇滅石鼓又缺失唯茲數十字適勁倚雲窟模印
徧華夷流傳耀細帙書誠一藝爾小道詎可忽乃知出
人事千古名不沒

東門送郎吏行寄承旨宋侍郎

西門送僕射鞍馬照落光南門送貳卿冠蓋遙相望東
門送郎吏艤舟隋隄傍郎吏誠隔品同直白玉堂丈人
况知已振拔在舉揚攜手惜我去深勸離別觴醉中不
記事烟水空茫茫醒來聞鳴櫓嘔軋獨一傷猶疑在禁

中殘漏寒丁當迴望銀臺間五雲遮帝鄉聚散今如此
升沉庸何傷丈人名位峻只欠登岩廊平居倦朝請高
論思退藏圃田有別業古木羅修篁草亭寒蕭蕭池波
碧泱泱嘗云拂袖去可以傲羲皇丈人果能爾識度非
尋常安車比踈廣辟穀如張良再拜願丈人壽考乃康
強自念山野士不解隨圓方宦途多齟齬身計頗悲涼
行將解簪笏歸去事農桑幸容操履杖洒掃循丘塲

北樓感事 有序

唐朱崖李太尉衛公為滁州刺史作懷嵩樓取懷歸
嵩洛之義也衛公自為之記其中述直翰林時同僚
存沒且有白雞黃犬之歎頗露知退之心及自滁徵
拜再秉鈞軸卒以怙權賈禍貶死海外則向之立言
誠空文爾皇宋至道元年夏五月僕自翰林學士尚
書禮部員外郎知制誥除工部郎中知滁州軍州事
到郡之日訪衛公舊迹樓之與記皆莫知也而郡有
北樓通刺史公署登眺終日甚亦自得作北樓感事

詩以見意

北樓出林杪登覽開病姿旁帶滁州城雉堞何逶迤下

入刺史宅却臨統軍池

孟統軍鑿小池在樓下

伊予翰林客失職

方在茲兩衙部領外盡日吟望時晚窓度急雨夏木交

繁枝淮南氣候殊經秋轉黃鸝簷前有山果採掇亦甘

滋樽中有官醞傾酌任醇醑忘機得真趣懷古生遠思

念昔李太尉落落邦家基下筆到西漢料兵如六竒謫

官來此郡鬱鬱持一麾嘗作懷嵩樓記文悲盛衰甚得

進退理深明禍福機未幾再入用斯言忽如遺君恩匪
膠柱天殃若影隨六月萬里行炎荒竟不歸功成又名
遂不退將安之姑以人事較勿憑天命推矧予草澤士
被褐復羹藜謬因弄文翰八載侍丹墀三入承明廬古
人期並馳玉堂百日罷所累非文辭強仕未為老望郎
不為卑淮邊永陽郡人物自熙熙費用量所入豐約從
其宜一妻本糟糠不識金翠施三男無庶孽詎愛紈綺
貲甘貧絕誅求易退無羈縻五十擬歸耕何必懸車期

且予望衛公雲龍與山麋唐賢昔際遇文雅道光輝進
士取將相易于俯拾棊自從五代來素風已陵遲干戈
為政事茅土輸健兒儒冠筮仕者僅免寒與饑至今明
聖代此風猶未移自無經濟術焉能碌碌為歸歟復歸
歟無忘北樓詩

官醞

為郡得官醞月給盈三斛地僻少使車時清罕留獄老
大復遷謫吾懷頗幽獨嬋娟樓上月爛熳池邊菊東院

與西亭脩脩風弄竹對此不開樽騷人應慟哭獨酌入
醉鄉陶然瞑雙目醒來成浩歎胡為事口腹彝酒書垂
戒羣飲聖所戮漢文亦禁酒患在糜人穀自從孝武來
用度常不足推酤奪人利取錢入官屋古今事相倍帝
皇道難復吾無奈爾何更盡杯中滌

黑裘

野蠶自成繭綠密為山紬此物產何許萊夷負海州一
端重數斤裁染為褻裘守黑異華侈崇儉非輕柔燠香

則無取風雪曾何憂朝可奉冠帶夜以為衾裘

一作晏
裯

嬰三十年庶幾跡相侔季子歎貂敝吾服已為優不恥
狐貉者亦當師仲由况我屢遷謫行採賡歌謳映髮垂
鷺頂植杖昂鳩頭袖寬可以舞老農即為儔不曳銀臺
門任爾爭封侯

聞鴉 有序

滁淮地也郡堞之上鴟鴞巢焉永夕鳴嘯不已妻子
驚死或終夜不寐因作詩以喻且徵前賢放逐而聞

是鳥者摠而述焉以見吾志

元精自萬彙羽族何茫茫為怪有鷓鴣為瑞稱鳳凰
凰不時出未識五色章吾生在鄒魯風土殊遠方鳴鳩
隨乳燕日夕巢吾梁翩翩雜鳥雀比屋率為常又從筮
仕來五年居帝鄉更直入承明侍宴趨未央上林聞鶯
囀巧舌如笙簧鷓鴣徒知名聞見實未嘗頃年謫商山
聽之已悲涼今茲出內庭罰郡來永陽誰知爾鷓鴣營
巢在城墻年加睡漸少秋盡漏且長鳴嘯殊不已歷歷

含微霜孺人泣我右稚子啼我傍吾心非達士詎免亦

悵悵人生縱百歲忽若石火光其間有窮通幽昧難自

量我愛臯與夔莪冠虞舜堂簫韶聞九成丹穴來鏘鏘

又愛閔與散陳力遇文王鸞鷲聽岐山多士周道昌嗟

嗟漢賈誼年少謫南荒故有鵬鳥賦倚伏理甚詳郇公

暨鄴侯放逐同一邦夜深聞此鳥韋公涕沾裳李侯舉

酒令斯音非不祥坐客如不聞罰之以巨觴遂使惡聲

鳥聽之無所傷

天寶中韋郇公謫守蘄州時李鄴侯亦
以處士放逐因夜飲聞鵙鳴韋公泣下

李侯曰此鳥人以為惡其聲可聽乃令坐客
有不聞其聲者罰以大杯由是聽之不厭
贊皇貶袁

州懷鶚義亦臧

李太尉有懷鶚賦

乃知昔賢哲未免亦悽惶况

予不肖者邀寵在朝行報國惟直道謀身昧周防四年
兩度黜髣髴已蒼蒼雖得五品官銷盡百鍊鋼何當解
印綬歸田謝膏粱教兒勤稼穡與妻甘糟糠鳳來非我
慶鴉集非我殃優游盡天年身世俱可忘

甘菊冷淘

經年厭梁肉頗覺道氣渾孟春致齋戒勅厨惟素飧淮

南地甚暖甘菊生籬根長芽觸土膏小葉弄晴暎采采
忽盈把洗去朝露痕俸麪新且細洩牢如玉墩隨刀落
銀鏤煮投寒泉盆雜此青青色芳香敵蘭蓀一舉無牙

遺空媿越盃存解衣露其腹稚子為我捫飽慚廣文鄭

饑謝魯山元

廣文先生飯不足
元魯山饑而死

况我草澤士藜藿供朝

昏謬因事筆硯名通金馬門官供政事食久直紫微垣

知制誥給政事
食自小許公始

誰言謫滌上吾族飽且温既無甘旨慶

焉用味品煩子美重槐葉直欲獻至尊

事見杜工部
槐葉冷淘詩起

予有遺韻甫也可與言

訓楊遂

楊君江左士文律何飄飄人言未冠時作賦凌洞簫甲

科中南國

江南狀元及第

通籍趨東朝

入中朝為贊善

輒軻位不進陶

潛還折腰

復為縣令

宰邑向蜀道萑蒲忽興妖官小力不支

犇竄避槍刀朝廷責守土黜入縣佐僚昨朝寫孤憤遺

我有客謠伊予亦左遷諷之心無憊人生一世間否泰

安可逃但問道何如未必論卑高自古富貴者撩亂如

蓬蒿德業苟無取未死名已消豈期顏子淵不朽在一
瓢推此任窮達其樂方陶陶達則為鷓鴣窮則為鷓鴣
垂天與巢林識分皆逍遙

和楊遂賀雨

我罷內廷職出臨永陽民永陽民雖庶未免多饑貧富
之既無術齷齷為謹身可堪今夏旱如燎復如焚厥田
本塗泥坐見生塵氛稚老無所訴嗷嗷望穹旻食祿憂
人憂早夜眉不伸從決獄中囚徧禱境內神楚辭有山

鬼廟貌羅水濱佛法有浮圖寺宇連城闔齋莊命寮窠
供給抽俸緡鼓笛迎湫水香花照金輪誠知非典故且
慰旱爇人偶與天雨會霧霽四郊勻插秧復修堰野叟
何欣欣可辨官賦調亦免農艱辛變調賴時相感應由
聖君子吾復何有敢望歌頌云清流楊水部德與我為
鄰仇香官位屈何遜詩格新見投賀雨詩言自人口聞
夫君益私我過實豈相親為霖非我事職業惟詞臣若
有民謠起當歌帝澤春庶使採詩官入奏助南薰

揚州寒食贈屯田張員外成均吳博士同年殿省

柳丞

前年寒食節待詔直內庭休假百官出獨掩深嚴扃近
侍不敢醉賜酒空滿餅間就通中枕時聞索上鈴思入
無何鄉兀然欲忘形去年寒食日滌上忝專城山歌喧
里巷春物媚池亭永陽溪水綠琅琊山色青謫宦自消
遣不敢誇獨醒往往取官醞時時對花傾醉來念身世
翻使淚縱橫今年蒞淮海時節又清明對案有留事聽

歌無歡聲胥徒費簿領使客煩送迎狴牢未空歇堰埭
勞修營衰病力不支懶慢性已成虛花滿雙目素髮添
數莖酒肴畧無味妓樂固難聽誰言寒食下終日取茶
烹屯田布素交屈此關市征昔年同應舉典衣飛巨觥
博士東觀客求官得步兵況且丹陛前同為出谷鶯殿
丞尹我邑桑梓復弟兄吏隱掌嵯茗終朝談道經三賢
宴會少七夕休假并何不策我馬廢苑尋流螢何不蕩
我舟樓臺訪摘星三春景欲盡九曲波始平居然逼吏

役頓此阻交情老態厭春華
病身憂宿醒如水若不改
藉糟亦胡寧解印蓄素志
吟詩露丹誠維揚非所愛
有便即歸耕

揚州池亭即事

冥心閱羣動亦各趨所安
胡為名利人戚戚常鮮歡
吾生四十四結珮呼郡官
掌言入綸閣待詔直金鑾
匪謂得祿少所嗟行道難
前年謫滁州憂時雙鬢殘
賴有琅琊溪時濯塵纓冠
朝命徙淮海任重力易殫
君恩詎可

報感激涕沆瀾民瘼不能治惻隱情悲酸况復多病身
名宦心已闌歸田未果決懷祿尚盤桓公退何所適池
亭一凭闌旭日媚春卉微風生鳴湍呵僮勿挾彈留客
不持竿用糞魚鳥馴熙熙肆游觀神仙未可學吏隱聊
自寬孤吟刻幽石此義非考槃

一品孫鄭昱

鄭網元和中拜相
至鄭昱六世矣

卜葬得假告南出安上門鞭馬六十里暮投中書村村
翁館我宿茆屋欲黃昏有客忽投刺自稱一品孫氣貌

不凡俗因為開酒罇坐久問家謀其族大且繁池州有
清節濫觴發洪源太傅擅鴻筆入相又出藩其家本開
封改號一何尊至昱始六代布衣老丘樊跨驢入府縣
驅犢耕郊原家廟固已毀國史空具存盛德百世著功
必格乾坤高太已不祀羨綢何可論况復起章句乘時
寵便蕃子孫雖替陵尚得守田園我愛三代時法度有
深根卿大夫稱家世世奉蘋蘩四民有定分宦路無馳
奔自從雜霸道傾奪日喧喧脫耒秉金鉞吮筆乘朱軒

朝榮暮又辱容易如掌翻古道不可復頽波益以渾何
况度木者倒置輪與轅我亦起白屋兩朝直紫垣蔭子
有冠裳賞延弟與昆盡待食人祿將何報君恩農桑國
之本孝義古所敦五族不力穡終歲飽且溫雖非享富
貴亦以蠹黎元唐賢尚消歇我輩奚足言呼兒諷此詩
播在箎與埙

月波樓詠懷

有序

月波之名不知得于誰氏圖經故老皆無聞焉因作

古詩一章凡六百八十字陷于樓壁庶使茲樓之名
得與詩俱不泯也

郡城無大小雉堞皆有樓其間有名者不過十數州吹
簫事遼迥仙迹難尋求庾公在九江締構何風流謝守
鎮宣城叠嶂名有由東陽敵八咏吾聞沈隱侯白雪架
郢中調高誰和酬黃鶴倚鄂渚仙去事悠悠贊皇謫滌
上作賦懷高丘樓居出俗態澤國多勝遊好景不遇人
安得名存留齊安吉郡廢移此清江頭築城隨山勢屈

曲伏環周茲樓最軒豁曠望西北陬武昌地如掌天末
入雙眸平遠無林木一望同離婁山形如八字會合勢

相勾

東晉方士戴洋言武昌有山無林山形八字勢不
及九故孫權以黃武元年都武昌八年遷建業

三國事既遠六朝名亦休近從唐末來爭奪互仇讐斯
樓備矢石此地控咽喉終朝望烽燧連歲事戈矛可憐
好詩景牢落無人收皇家統萬國遠邇盡懷柔三聖四
十年蕩蕩文德修淮甸為內地黃岡壓上游儒官假郡
印踐更若公郵况多辨職吏誰宥恣吟謳伊余何為者

竊慕騷人儔兩朝掌文翰十年侍冕旒去歲出西掖謫
居抱窮愁日日江樓上風物得冥搜何人名月波此義
頗為優西南新桂魄初上懸玉鈎晚瀨清且淺漂蕩影
沉浮三五金波滿夜光如暗投驪龍弄頷珠晃朗照汀
洲澹臺拔寶劍碎壁斬長虬水輪曉入地推下赤金毬
闌干四五星斜漢印清秋誰家上元燈兒戲剗菰蘇此
景吟不出謾使聲呦呦千里畫圖濶四時詩興幽野花
媚宮纈芳草鋪碧紉火雲照沙浦暴雨傾瓦溝白亂蘆

花散紅殷蓼穗稠簷冰垂若練雪片大于鷗江籬煙漠
漠官柳雨颼颼舟子斜盪漿牧童倒騎牛水獺有時戲
江豚頗能洄山鳥奏箏籟落霞展衾裯魚網雪離離酒
旗風颼颼旅懷雖自適詩物奈相尤右顧徐邈洞精靈
如在不左瞰伍員廟荒隙令人羞樓中何所有官醞湛
蚍蜉棋枰留客坐琴調待僧抽橘苞鄰藥鼎墨筆間茶
甌平生性幽獨寂寞誰獻酬官常已三黜懷抱罹百憂
凭闌憶王粲望闕同子牟自甘成潦倒無復事聲猷身

世喻泡幻衣冠如贅瘤
放意無何鄉誰分親與讐
寓形朝籍中毀譽任啁啾
君恩無路報民瘼無術瘳
唯慙戀祿俸未去耕田疇
題詩郡樓上含毫思夷猶
功名非范蠡何必泛扁舟

十月二十日作

是日甚寒
始有冰

重衾又重茵
葢覆衰爛身
中夜忽涕泗
無復及吾親
須臾殘漏歇
吏報國忌辰
凌旦騎馬出
溪水薄潏潏
路傍饑凍者
顏色頗悲辛
飽暖我不覺
羞見黃州民
昔賢終

祿養往往歸隱淪誰教為妻子頭白走風塵修身與行道多媿古時人

成武縣作

釋褐來成武初官且自強位卑松在澗俸薄葉經霜雨
菌生書案饑禽啄印牀猶驚寫秋卷槐砌落花黃

寄碭山主簿朱九齡

忽思蓬島會羣仙二百同年最少年利市襴衫拋白紵
風流名紙寫紅牋歌樓夜宴停銀燭柳巷春泥污錦韉

今日折腰塵土裏，共君追想好淒然。

寄魚臺主簿傅翺

聽說魚臺景最奇，鮑參軍到語多時。

時林法掾來自魚臺，因言烟水之興。

故有此句天晴綠野懸魚網，木脫空城露酒旗。錦擲鮮鱗紅

撥刺，雪翻寒鷺白。襪仍誇縣尹，風騷客應有秋來唱和詩。

寄寧陵陳長官

吏隱寧陵縣，琴堂枕古河。家山隔江遠，風雨過船多。儼

日親尋藥公庭自種莎相逢如舊識執手動勞歌

寄金鄉張贊善

年少辭榮自古稀朝衣不着着斑衣北堂侍膳侵星起
南畝催耕冒雨歸種竹野塘春笋脆採蘭幽澗露牙肥
伊予自是徒勞者未得同尋舊釣磯

遊虎丘山寺

寺墻圍着碧孱顏曾是當年海湧山盡把好峰藏院裏
不教幽景落人間劔池草色經冬在石座苔花自古斑

珍重晉朝吾祖宅一迴來此便忘還

寄獻潤州趙舍人

南徐城古樹蒼蒼衙府樓臺盡枕江
甘露鐘聲清醉榻
海門山色滴吟窓直廬久負題紅藥
出鎮何妨擁碧幢
聞說秋來自高尚道裝筇竹鶴成雙

記言彩筆罷摛華郡閣高閒似道家
琴院坐聽江寺磬
郡樓吟見海山霞春園遺母親燒笋
夜榻留僧自煮茶
應笑陶潛未歸去折腰奔走在泥沙

寄毗陵劉博士

毗陵古郡接江垸赴任琴書共一船
下岸且尋甘露寺到城先問惠山泉
秋蟾吐檻供吟興野鶴偎床伴醉眠
官散道孤詩筆老不應雙鬢更皤然

除夜寄羅評事同年二首

歲暮洞庭山知君思浩然年侵曉色盡
人枕夜濤眠移棹風搖浪開窓雪滿天
無因一乘興同醉太湖船
郡僚方賀正獨宿太湖稜塔下羞為吏
船中祇載僧折

梅和薄雪煮茗對孤燈應笑排衙早寒靴踏曉冰

春日官舍偶題

薄宦苦流離壯年心已衰鶯花愁不覺風雨病先知
曉月晃竹屋寒苔疊檜籬無人慰幽寂庭柳自低垂

寄獻翰林宋舍人

金鼎鹽梅偶未和位高猶說野情多官墻月上開琴匣
道院風清响藥籬留客旋燒含露筍倩僧教種耐霜莎
孤寒知有為霖望未忍江頭釣綠波

吳江縣寺留題

松江江寺對峰巒
檻外生池接野灘
幽鷺靜翹春草碧
病僧閒說夜濤寒
晨齋施筍惟溪叟
國忌行香祇縣官
盡日門前照流水
塵纓渾擬濯沈瀾

中元夜宿餘杭山仙泉寺留題

祭廟迴來略問禪
蘚墻莎徑碧山前
風疏遠磬秋開講
水響寒車夜救田
藍綬有香花菡萏
竹窓無寐月嬋娟
自慚政術貽枯旱
忍卧松陰漱石泉

言懷

宦途日日與心違
人事紛紛任是非
却為遊山置行李
漁家船舫道家衣

泛吳松江

葦篷疎薄漏斜陽
半日孤吟未過江
唯有鷺鷥知我意
時時翹足對船窓

蘇州寒食日送人歸覲

江城寒食下花木
慘離魂幾宿投山寺
孤帆過海門蓬

聲潑火雨柳色禁烟村定省高堂後斑衣減淚痕

春晚遊太和宮

數里新萍夾岸莎春來乘興宿烟蘿隨風蝴蝶顛狂甚
當路花枝採折多絳節參差抽苦笋翠鈿狼藉撒圓荷
湖山滿眼不歸去空羨漁翁雨一蓑

再泛吳江

二年為吏住江濱重到江頭照病身滿眼碧波輸野鳥
一蓑疎雨屬漁人隨船曉月孤輪白入座晴山數點春

張翰精靈還笑我綠袍依舊惹埃塵

贈湖州張從事

前年春榜亞龍頭詞賦曾推第一流
上直未歸紅藥院
供吟先得白蘋洲
酒醒野寺烹山蕨
公退溪亭狎海鷗
自是吳門折腰吏
滿衣塵土為君羞

送李中舍罷蕭山赴闕

吏隱江東五六年
歸時猶戀好山川
野僧送別攜詩句
瘦馬臨歧當酒錢
吳苑醉逢梅弄雪
隋堤吟見柳垂烟

自言更共秋濤約未捨西興一釣船

和郡寮題李中舍公署

樹影池光映曉霞綠楊陰下吏排衙閒拖屐齒妨橫筍
靜拂琴床有落花地脉暗分吳苑水厨烟時煮洞庭茶
青宮詞客多閒暇按曲飛觴待歲華

題張處士溪居

雲裏寒溪竹裏橋野人居處絕塵囂病來芳草生漁艇
睡起殘花落酒瓢閒把道書尋晚逕靜搗茶鼎洗春潮

長洲懶吏頻過此為愛盤殮有藥苗

送查校書從事彭門

佐幕徐方鬢未秋官升芝閣更風流姓名舊在鶯遷榜
詩什重題燕子樓漸有俸錢供藥債應無歸夢到漁舟
公餘時上臺頭寺珠履金貂共勝遊

送羅著作奉使湖湘

使星躔次入長沙曉別延英去路賒數刻漏中承密旨
幾重湖外奉皇華山行馬拂湘川石寺宿僧供嶽麓茶

迴日期君直西掖當階紅藥正開花

送馮學士入蜀

錦川宜共少年期四十風情去未遲
蠶市夜歌欹枕處峨眉春雪倚樓時
休誇上直吟紅藥多羨乘輶聽子規
莫學當初杜工部因循不賦海棠詩

賀將作孔監致仕

泣辭明主挂冠簪便約幽雲老舊林
朝請罷來頻典笏田園歸去只攜琴
焚香靜院當山色晒藥空庭避竹陰

一子得官三品祿未饒疎傳有黃金

和陳州田舍人留別

絲綸多暇每封章暫去頒條道更光郡吏好排紅粉妓
使君曾是紫薇郎樓臺有月新詩出囹圄無人綠草長
地接清淮足佳致水村煙塢似魚鄉

閣下暮春

詔書稀少日何長閒枕通中睡一場院吏報來丞相出
紫薇花影上東廊

初入山聞提壺鳥

時秋暖此鳥忽聞

遷客由來長合醉不煩幽鳥道提壺商州未是無人境
一路山村有酒沽

初到商州館于妙高禪院佛屋壁上見草聖數行
讀之乃數年前應制時所作皇帝試貢士謔思
追前事有感而成章

應制謔篇對玉除是誰傳寫到商於昔從莫莢階前作
今向蓮花座畔書商嶺未甘隨綺季漢庭曾忝用相如

山僧莫怪頻垂淚乍別承明舊直廬

謫居感事

一百六十韻

遷謫獨熙熙襟懷自坦夷孤寒明主信清直上天知消
息還依道生涯只在詩唯當喻山木詎敢詠江籬偶嘆
勞生事因思志學時讀書方覩奧下筆便搜竒賦格輕
鸚鵡儒冠薄鷓鴣耕桑都不事園井未曾窺必欲縑湘
富寧教杼軸紕光陰常矻矻交友盡惻惻步驟依班馬
根源法孔姬收螢秋不倦刻鵠夜忘疲流輩多相許時

賢亦見推叨榮偕計吏濫吹謁春司僕瘦途中病驢寒
雪裏騎空拳入場屋拭目看京師技癢初調箭鋒鋌欲

試錐甲科登漢制

太平興國五年
予首中甲科

內殿識堯眉數刻愁

晡矣三題亦勉之先鳴翰俊彥上第遂參差罷舉身何
托還家命自竒惟慚親倚戶敢望嫂停炊竭力求甘旨
終朝走路岐貪希仲由米多廢董生帷丹桂何時折孤
蓬逐吹移知憐無國士志氣自男兒季子貂裘敵狂生
刺字隳廣場重考覆蹇步載馳驅明代寧甘退青雲暗

有期禮闈冠多士御試拜丹墀澤霧寧慚豹搏風宵伏
雌重瞳念孤迹一第忝鴻私得告還鄉貴除官佐邑卑

折腰稱小吏矩步慎初資

予解褐得主簿

枳棘心何恨松筠操

自持及親家有養事長禮無虧銅墨官常改煙霄雨露

垂縣花聊主管寺棘且羈縻

予九年授大理評事知蘇州長洲縣

吳郡包

山側長洲巨海湄萬家呼父母

民間多呼縣令為父母官

百里撫惇

嫠敢起徒勞嘆長憂竊祿嗤宦途甘碌碌官業亦孜孜

政事還多暇優游甚不羈村尋魯望宅寺認館娃基

甫里

有陸魯望宅靈
岩寺館娃故宮

西子留香逕吳王有劔池

採香逕在靈
岩寺劔池在

寺
虎丘

狂歌殊不厭酒興最相宜草織登山履蒲紉

平挽

舫綏果酸嘗橄欖花好插薔薇震澤柑包火松江鱸縷

絲三年無異政一篋有新詞多戀南園卧

蘇州南園
最為勝景俄

從北闕追

雍熙四年予
奉徵召赴闕

呈材真樸橄召對立茅茨載筆

居三館登朝忝拾遺紫泥天上降朱紱御前披侍從殊

為貴圖書頗自怡史才媿班固諫筆謝辛毗擬把微軀

報慚將厚祿尸安邊上章疏

端拱三年詔百官各言邊
事因上封章極言為上容

納端拱獻箴規

予初拜拾遺即上端拱箴頗有諷諭

精鑒逢英主，知憐是

首夔

予論邊事特為趙許公所器

賡歌才不稱，掌誥筆難搞

是歲蒙上召予

殿上作歌遂拜制歷多無事

閣下有制歷當直舍人如無除目書名而出

詞頭

每怯遲繁陰，溫室樹清吹。萬年枝青瑣，霞光透蒼苔。露

片萎御香，飄硯席。宮葉落纓綉，看浴池心鳳。閒捫殿角

螭，上林花掩映。仙掌露淋漓，對近瞻旒冕。班清辟虎貔

宮簾垂翡翠，御水動連漪。紀號年淳化，朝元月建寅。

移叶

攝官捧寶冊

淳化元年立正伏別上尊號予攝中書侍郎捧玉冊玉寶

祝壽執樽彝

表案行低折

時子又押諸方表案

宮懸聽肅祇德音王澤潤

是月德音

降謙柄斗杓移

時上省尊號

貴接臯夔步深窺龍鳳姿策勲

何煊赫賜紫更菱蕤

是歲加柱國謝日面賜金紫

蚊力山難負鵜梁

翼易滋論功慚八柱受服欲三褫

音遲

祇慮殃將至曾無

事可裨趨朝空俯偃退食自逶迤更直當春好橫行隔

宿咨

每休假三日後謂之橫行于正衙參假院吏隔夜報

內朝長得對駕幸每教

隨瓊苑觀雲稼金明閱水嬉賞花臨鳳沼侍釣立魚坻

拂面黃金柳醜顏白玉卮分題宣險韻

每應制賦詩

翻

勢得仙碁

上嘗賜兩制碁勢圖一日對面千里二曰獨飛天蛾三曰海底取明珠四曰妙算無窮人

莫能曉

竟舉窺天管爭燃煮豆萁恨無才應副空有表虔

祈

每有御製詩韻難并新碁勢但上表免和訴不曉而已

睿睠偏稱賞天顏極撫

綏中官賜文字

兩朝每賜御詩皆遣中官送至本院院吏捧巾綦遭遇誠

堪惜功名竊自思請纓無壯志視草亦胡為未獻東封

頌空鐫北嶽碑

淳化元年奉勅重修北嶽予撰碑

深慚專俎豆長欲議

邊郵但可懷驕子何須斬谷蠡胷中貯兵甲堂上有熊

羆成敗觀千古施張在四維兼磨斷佞劔擬樹直言旗

已上蓋言子平生之志也遇事難緘默平居疾嗻咿無權逐鳥雀俛

首任狐狸廷尉專刑煞

以制誥舍人兼大理寺事

詞臣益寵衰五花

儀久廢三尺法聊施書命猶無諂

予在閣下草詞多不虛飾以此亦為人所

怨

評刑宥有欺厚誣陵近侍內亂疾妖尼

妖尼道安誣告徐騎省

丹筆當無赦金科了不疑拜章期悟主引法更防誰萋

菲終無已雷霆遂赫斯如弦傷訐直投杼覓瑕疵衆鑠

金須化羣排柱不支佞權迴北斗讒舌簸南箕闕下羊腸

險朝端虎尾危道孤貽衆怒責薄賴宸慈西掖除三字

南山佐一麾蒼黃塵滿面揮洒涕交頤目斷九重闕魂

銷八達逵尊親遠扶持兄弟盡流離秦嶺偏巉絕商於

更嶮巖吾廬何處是我馬忽長辭六里山蒼翠丹河浪

渺瀰分封思衛鞅割地憶張儀懶讀三閭傳空尋四皓

祠畬煙濃似瘴松雪白如梨壞舍床鋪月寒窓硯結澌

振書衫作拂解帶竹為椀呼僕泥茶竈從僧借藥篩鐘

愁上寺起角怨水門吹上寺在州北舊友誰青眼新秋

出白髭子到商州始有白髭煙嵐晴鬱鬱風雨夜颼颼我過徒三

省吾生自百罹初來聞旅雁不覺見黃鸝市井攜山菜

房廊蓋木皮

商州民多以木皮蓋屋

野花紅爛熳山草碧氈裨副

使官資冷商州酒味醜尾因求食掉角為觸藩羸有夢

思紅藥無心採紫芝瘦妻容慘戚稚子淚漣沔暖怯虵

穿壁昏憂虎入籬松根燃夜燭山蕨助朝饑豈獨堂虧

養還憂地乏醫跡飄萍渤海親老日崦嵫閣下辭巢鳳

山中伴野麋風欺秀林木雲隔向陽葵屈產遭駑馬丹

山困嚇鷓悔須分黑白本合混妍媸自此韜餘刃終當

學鈍鎚窮通皆有數得喪又奚悲自顧才何者空憐道

在茲宣尼猶削伐大禹亦胼胝運去當如鼠投來且禦

魑避風聊戢翼得水會揚鬢琴酒圖三樂詩章效四雖

白公有四雖詩魚須從典賣貂尾任傾欹兀兀拖腸鼠悠悠

尾龜北窓尋蛺蝶南岸看鷓鴣山翠樓頻上雲生杖獨

搯簾閒留曉魄簷暖負冬曦松柏寒仍翠瓊瑤湮不緇

望誰分曲直祇自仰神祇吾道寧窮矣斯文未已而狂

吟何所益孤憤洩黃陂

龍鳳茶

樣標龍鳳號題新賜得還因作近臣烹處豈期商嶺水
碾時空想建溪春香于九畹芳蘭氣圓似三秋皓月輪
愛惜不嘗惟恐盡除將供養白頭親

上寺留題

在商州
北山作

松杉疎瘦簇山根樓殿參差對郭門不惜馬蹄來北寺
為憐熊耳在西山一作軒雲生石砌搖寒影泉汲銅餅露
凍痕遷客頻來何所得一叢修竹拂吟魂

歲暮感懷貽馮同年中允二首

謫居商於郡閒門車馬稀塵侵書命筆香散入朝衣燒
盡峰巒出霜晴木葉飛夜來天欲雪寒夢不成歸
謫居京信斷歲暮更淒涼郡僻青山合官閒白日長燒
烟侵寺舍林雪照街坊為有遷鶯侶詩情不敢忘

畬田詞 并序

上洛郡南六百里屬邑有豐陽上津皆深山窮谷不
通轍迹其民刀耕火種大抵先斫山田雖懸崖絕嶺

樹木盡仆俟其乾且燥乃行火焉火尚熾即以種播之然後釀黍稷烹雞豚先約曰某家某日有事于畬田雖數百里如期而集鉏斧隨焉至則行酒啗炙鼓譟而作蓋斲而掩其土也掩畢則生不復耘矣援桴者有勉勵督課之語若歌曲然且其俗更互力田人自勉僕愛其有義作畬田詞五首以侑其氣亦欲採詩官聞之傳于執政者苟擇良二千石暨賢百里使化天下之民如斯民之義庶乎汙萊盡闢矣其詞則

取乎俚蓋欲山民之易曉也

大家齊力斲孱顏耳聽田歌手莫閒各願種成千百索

山田不知畝畝但以百尺繩量之曰
某家今年種得若干索以為田數

豆萁禾穗滿青山

殺盡雞豚喚斲畬由來遞互作生涯莫言火種無多利

樹種明年似亂麻

種穀之明年自然
生禾山民獲濟

鼓聲獵獵酒醺醺斫上高山入亂雲自種自收還自足

不知堯舜是吾君

北山種了種南山相助刀耕豈有偏願得人間皆似我

也應四海少荒田

畚田鼓笛樂熙熙空有歌聲未有詞從此商於為故事
滿山皆唱舍人詩

賀畢翰林新入

閒步花磚喜復悲所悲君較十年遲銀臺曉入批丹詔
銅鏡秋開鑷白髭宮錦細袍宣與着內閑驕馬賜來騎
家門記得咸通事莫忘論兵夜召時

咸通中畢相在翰林時懿宗將復河

渙夜召論邊事數陳方畧甚稱旨上曰吾方謀帥不意頗散在吾禁苑遂有登壇之命

商山海棠

錦里名雖盛商山艷更繁別疑天與態不類土生根淺
著紅蘭染深于絳雪噴待開先釀酒怕落預呼魂香裏
無勅敵花中是至尊桂須辭月窟桃合避仙源浮動冠
頻側霓裳袖忽翻望夫臨水石窺客出墻垣贈別難饒
柳忘憂官讓萱輕輕飛燕舞脉脉息媯言蕙陋虛侵逕
梨凡浪占園論心留蝶宿低面厭鶯喧不忝神仙品何
辜造化恩自期栽御苑誰使擲山村綺季荒祠畔仙娥

古洞門煙愁思舊夢兩泣怨新婚畫恐明妃恨移同卓
氏奔祗教三月見不得四時存繡被堆籠勢燕脂浥淚
痕貳車春未去應得伴芳樽

翰林畢學士寄示醫癭疾藥方因題四韻兼簡兩
制諸知

預憂囊癭病龍鍾乞得仙方必有功縱免項如樗里子
也應頭似夏黃公西暉亭上峰巒碧

亭在州之西十里對羣峰每日落時

有如南靜川中木葉紅

川在州之南二三里平如掌石人百餘家秋果一川紅黃又有

小桃細竹夾水而生
春間此景不惡矣

盡是貳車堪醉處
春來惟恐酒樽

空

賀柴舍人新入西掖

早折蟾宮第一枝
綸闈恩命若何遲
久為俗吏殊無味
合掌王言亦有時
好繼忠州文最盛
應嫌長慶格猶卑
舍人嘗與余評前賢詔誥以為陸相首出
若奉天罪已詔元白之徒可坐在廡下
他年莫忘中

吳宰六里山前謔紫芝

歲除日同年馮中允攜觴見訪
因而沉醉病酒三

日醒而偶贈

除夜渾疑便白頭，攜壺相勸醉方休。
敢辭枕上三朝卧，且免燈前一夕愁。
薄命我甘離鳳闕，多才君亦滯龍樓。
相逢不盡杯中物，何以支當寂寞州。

放言

誰信人間是與非，進須行道退忘機。
卦逢大壯羝羊困，鄉入無何蛺蝶飛。
澤畔衣裳蘭作佩，山中生計竹為扉。
饑腸已共夷齊約，一曲高歌去採薇。

回襄陽周奉禮同年因題紙尾

武關西畔路巉岩
兩月勞君寄兩緘
鏡裏想添新白髮
篋中猶貯舊青衫
扶頭酒好無辭醉
縮項魚多且放噉
譬似元和張太祝
十年不改舊官銜

清明日獨酌

一郡官閒惟副使
一年冷節是清明
春來春去何時盡
閒恨閒愁觸處生
紫燕黃鸝誇舌健
柳花榆莢鬪身輕
脫衣換得商山酒
笑把離騷獨自傾

寒食

今年寒食在商山山裏風光亦可憐稚子就花拈蛺蝶
人家依樹繫鞦韆郊原曉綠初經雨巷陌春陰乍禁烟
副使官閒莫惆悵酒錢猶有撰碑錢

山僧雨中送牡丹

數枝香帶雨霏霏雨裏攜來叩竹扉擬戴却休成悵望
御園曾插滿頭歸

春居雜興

兩株桃杏映籬斜，粧點商州副使家。
何事春風容不得，和鶯吹折數枝花。

春雲如獸復如禽，日照風吹淺又深。
誰道無心便容與，亦同翻覆小人心。

登郡南樓望山感而作

西接藍田東武關，有唐名郡數商顏。
二千石盡非吾道，一百年來負此山。

自唐末至今百餘年無文臣為刺史

重疊曉嵐新雨後

參差春雪夕陽間，唯供遷客風騷興。
醉望吟看不可間。

道服

楮冠布褐皂紗巾曾忝西垣寓直人
此際暫披因假日如今長着見閒身
濯纓未識三湘水漉酒空經六里春
不為行香着朝服貳車誰信舊詞臣

春遊南靜川

南過高車嶺

一云膏車嶺音音告

川源似掌平峰巒開畫障猷猷

列碁枰帝女柔柔綠王孫野草生
提壺催我醉戴勝勸人耕商嶺堪
攜妓丹河好濯纓蓋圓松影密鞭
亂竹根

獐勃勃畲田氣磷磷水磴聲野桃誰是主山鳥不知名
欲舞寧無蝶思謔亦有鶯官閒春日永擔酒此中行

南郊大禮詩七首

聖君重卜祀南郊仗擁黃麾間白旄仙吹冷翻蒼玉佩
曉霞晴透絳紗袍天開堯率齋宮靜海湧蓬萊帳殿高
遷客生還知有望商山不敢讀離騷

嚴配郊丘展孝思質明叅酌禮無違太羹味薄牲牲潔
至樂聲和鳳鳥飛黃道月斜風細細紫壇天曉露霏霏

可憐此夜商山客
畫盡爐灰淚滿衣

綵城殘月帶微霜
版奏中嚴夜未央
三獻欲終侵曙色
百神齊下散天香
珠旒微亂墀
篋韻柴燎輕籠劍佩光
此夕商山對何物
猿啼鳥哭樹蒼蒼

嚴裡禮退一陽生
抃賀歡呼動四溟
聖壽久長南至日
寶圖高大北辰星
九重城闕天將曙
百萬人家戶不扃
知有化工無棄物
海波分納一浮萍

乾元門上赭袍光
雉扇初開散御香
郊祀一千年運祚

赦書三萬里封疆人間草木沾皇澤天上咸韶送壽觴
惆悵昔年曾侍從而今翻似鼠拖腸

千官雲擁御樓時朝服紛紛換禮衣萬里梯航歸大國
一聲雷雨破圜扉青蠅傳去人人喜丹鳳啣來處處飛
收盡洛南遷客淚全家潛望日邊歸

年來不見祀圓丘謫宦攜親嘆白頭作賦有時悲鵬鳥
殺身無路學犧牛非才豈合居臺閣歸夢徒勞近冕旒
千載遭逢如未替此時重見帝王州

恭聞种山人表謝急徵不赴

表讓皇家買酒錢

上令京兆府賜山人酒錢讓而不受

醉鄉歸去更陶然

吾君若問徵君意自有東臯種黍田

不應明時鵠板書可能終老傲唐虞
神仙見說須陰德
宥為蒼生一出無

五更睡

數載直承明寵深還若驚起朝雞喚
起殘夢馬馱行左
宦離雙闕高眠盡五更如將閒比貴
此味敵公卿

遣興

百年身世片時間，况是多愁鬢。早班貧有琴書，聊自樂。
貴無功業未如閒。波平南浦，堪垂釣日。滿東窓尚掩關。
祇為慈親憶歸去，商山不隱隱。何山

新秋即事二首

宦途流落似長沙，賴有詩情遣歲華。吟弄淺波臨釣渚，
醉披殘照入僧家。石挨苦竹旁抽笋，雨打戎葵卧放花。
安得君恩許歸去，東陵閒種一園瓜。

百歲浮生一夢中
夢中何事有窮通
姓名舊署黃麻紙
顏狀今成白髮翁
煙暝小窓螢火碧
雨昏幽徑蓼花紅
謫居始信為儒苦
生計兼無一畝宮

秋居幽興三首

秋光雖寂淡幽興入詩家
籬暗螢啼菊園荒蟻上茄圍
碁知日影理髮見霜華
向曉兒童喜溪僧遺晚瓜
園林經積雨晚步思悠哉
宿鳥頭相並秋瓜頂自開
藥田荒野蔓屐齒沒蒼苔
幽興將何遣焦琴貫酒來

謫居人事慵幽興與誰同僧到烹秋菌兒啼索草蟲掃
苔留嫩綠寫葉惜殘紅歲晏琴樽好籬邊有菊叢

前賦春居雜興詩二首間半歲不復省視因長男
嘉祐讀杜工部集見語意頗有相類者咨于予
且意予竊之也予喜而作詩聊以自賀

命屈由來道日新詩家權柄敵陶鈞任無功業調金鼎
且有篇章到古人本與樂天為後進

予自謫居時多取
白公詩時時玩之

敢期子美是前身從今莫厭閒官職主管風騷勝要津

村行

馬穿山徑菊初黃
信馬悠悠野興長
萬壑有聲含晚籟
數峰無語立斜陽
棠梨葉落胭脂色
蕎麥花開白雪香
何事吟餘忽惆悵
村橋原樹似吾鄉

淳化二年八月晦
日夜夢于上前賦詩
既寤唯省一句云
九日山川見菊花間
一日有商於貳車之
命實以十月三日
到郡重陽已過殘
菊尚多意夢已徵
矣今忽然一歲又
逼登高追續前詩

因成四韻

節近登高忽嘆嗟
經年憔悴別京華
貳車何處搔蓬鬢
九日山川見菊花
夢裏榮衰安足道
眼前杯酒且須賒
商於鄒魯雖迢遞
大底攜家即是家

仲咸就嘉郡印因以四韻為賀且有以勉之

如何小郡滯清賢
未得徵歸振鷺班
莫怕三年持漢詔
猶勝遷客卧商山
俱諳宦路須推命
同有詩情合好閒
唯是謫官無考限
比君知向幾時還

寄豐陽喻長官

七十年華鬢未霜，道情偏稱宰豐陽。且衙請印無仇覽，

豐陽戶不滿千例省主簿

夜榻圍碁祇孟光

喻好碁與內子敵手

庭戶萬重嵐

氣潤盤餐數，飮藥苗香猶言彭澤終歸去，門柳青青檻菊黃

喜雪貽仲咸

半冬無雪懶吟詩，薄暮紛紛喜可知。衣上惹來看不足，竹邊聽處立多時光。迷曙色侵窓早，片舞寒空到地遲。

今日使君吟望好一車飛絮醉褰帷

霽後望山中春雪

誰種離離碎玉苗曉樓吟望興偏饒
白雲作伴宜長在紅日無情已半銷
聚映早霞明野寺散隨春水過溪橋
世間安得王摩詰醉展霜縑把筆描

杏花七首

紅芳紫萼怯春寒蓓蕾粘枝密作團
記得觀燈鳳樓上百條銀燭淚闌干

暖映垂楊曲檻邊
一堆紅雪罩輕煙
春來自得風流伴
榆莢休拋買笑錢

桃紅梨白莫爭春
素態妖姿兩未勻
日暮墻頭試回首
不施朱粉是東鄰

長愁風雨暗離披
醉遶吟看得幾時
只有流鶯偏稱意
夜來偷宿最繁枝

登龍曾入少年場
錫宴瓊林醉御觴
爭戴滿頭紅爛熳
至今猶雜桂枝香

長安廢棄遷都後，曲沼荒涼一夢中。
見說舊園為茂草，寂寥無復萬枝紅。

陌上紛披枝上稀，多情猶解撲人衣。
雙成灑道迎王母，十里濛濛絳雪飛。

日長簡仲咸

日長何計到黃昏，郡僻官閒晝掩門。
子美集開詩世界，伯陽書見道根源。
風飄北院花千片，月上東樓酒一樽。
不是同年來主郡，此心牢落共誰論。

自嘲

三月降霜花木死
九秋飛雪麥禾灾
蟲蝗水旱霖霖雨
盡逐商州副使來

偶置小園因題二首

十畝春畦兩眼泉
置來因得弄潺湲
三年謫宦供厨菜
數月朝行貫宅錢
空媿先師輕學圃
未如平子便歸田
此心久畜耕山計
不敢拋官為左遷

偶營菜圃為盤飧
淮瀆祠前水北村
泉響靜連衙鼓響

柴門深近子城門濛濛細雨春蔬甲疊疊寒流老樹根
從此商於地圖上畫工添个舍人園

三月二十七日偶作簡仲咸

一未量移一轉勲

時赦後予未量移
仲咸祗加騎都尉

貂冠羊胃摠非真

予檢校常侍故云貂冠
仲咸騎都尉故云羊胃

韶光祗有兩三日浮世稀逢七

十人青杏勸君重酌酒牡丹邀我且尋春請看富貴趙
中令已作北邙山下塵

別丹水

曾經爛漫濯吾纓，忍別潺湲月夜聲。
便入紅塵染詩思，吟魂猶合數年清。

寄潘處士

賣藥先生白布衣，書來方信在京師。
減君爐裏燒丹術，助我山中買酒貲。

處士自京寄白金相贈

閒似野雲終不住，閑如

籠鶴已多時。飄飄又去黃河北，更負中條幾首詩。

自寬

身世龍鍾且自寬，追量才分合饑寒。
朝中舊友休誇貴，

篋裏新詩不博官
曉髮靜梳微霰落
夜琴閒拂古風殘
會須歸去滄江上
累石移莎擁釣灘

贈衛尉宋卿二十二丈

謫宦歸來髮更斑
徊翔猶在寺卿閒
幾多僚友三台上
大半生徒兩制間
舊賜錦袍多貫酒
新裁紗帽欲歸山
東垣小諫龍鍾甚
空媿洪爐早鑄顏

送融州任吳戶曹撰越王愛姬墓誌得罪

御前曾取好科名
一掾如何萬里行
身落蠻方人共惜

罪因文學自為榮
吏供版籍多魚稅
民種山田見象耕
君看咸通十司戶
投荒終久是公卿

寧公新拜首座因贈

著書新奏御
上詔承旨蘇公道士韓德純與公集三教聖賢事迹各五十卷故有首座之命
優

詔及禪扉首座名
雖貴家山老未歸
磬聲寒遶枕塔影
靜侵衣終憶西湖上
秋風白鳥飛

幕次間吟三首

二年憔悴詠江籬
恩詔重教侍玉墀
寓直掖垣休入夢

常參幕次且吟詩新文自負山中集舊吏多驚髣髴絲
莫道諫官無一事猶勝閒卧解州時

文章曾受帝褒稱幕次孤吟冷似冰借馬趨朝長後到
問人求米盡難憑僮教罷樂朝無酒免廢看書夜絕燈
除却金章在腰下其餘滋味一如僧

江籬吟盡鬢成霜謫宦歸來夢一場每日祇窺丹鳳案
被人猶喚紫薇郎齋宮獨坐風翻幕客舍閒吟葉滿床
若是承明容再入未曾荒廢舊文章

寄題義門胡氏華林書院

水閣山齋架碧虛，亭亭華表映門閭。
力田歲取千箱稻，好事家藏萬卷書。
旋對杯盤燒野筍，別開池沼養溪魚。
吾生未有林泉計，空媿妨賢卧直廬。

送張監察通判餘杭

郡城瀟灑浙江濱，暫輟乘驄慰遠民。
莫放霜威誇御史，且收風景屬詩人。
雪侵樓上迎潮眼，花擁湖中泛月身。
盡是公餘吟咏處，好飛佳句寄詞臣。

書齋

年年賃宅住閒坊也作幽齋着道裝守靜便為生白室
著書兼是草玄堂屏山獨卧千峰雪御札時開一炷香
莫笑未歸田里去宦途機巧盡能忘

送柴諫議之任河中

蒲津名郡得名公諫紙盈箱且罷封紅藥堦墀曾吐鳳
綠莎廳事舊鳴蜚

故事河府院有綠莎廳唐來治平時好事者嘗加澆溉兵興之後為不好

事剷去之公好事者也
可復此景故云

下車首謁重華廟入境先經五老

峰見說丘門詩版在應教回也繼遺蹤

故兵部王侍郎嘗知河府公之

也座主

送李著作

芸閣新銜捧詔歸歷陽湖畔拜庭闈已聞愛子披朱紱
著作郎君猶學嬰兒著綵衣飯饋海陵紅稻軟鱸擎淮
水白魚肥吾生自失榮親祿謾踏花磚入北扉

滁州官舍

忽從天上謫人間知向山州住幾年俸外不教收果實

公餘多愛入林泉
朝簪未解雖妨道
宦路無機即是禪
鈴閣悄然私自問
郡齋何異玉堂前

今冬

休思官職落青雲
且算今冬養病身
白紙糊窓堪聽雪
紅爐著火別藏春
旋竊官醞漂浮蟻
時取溪魚削白鱗
况是豐年公事少
為郎為郡似閒人

高閒

謫官滌上欲何為
惟把高閒度歲時
費盡俸錢因合藥

忙于公事是吟詩
京中吏去慵傳信
江外僧來與撰碑
更待吾家婚嫁了解
龜休致未全遲

臘月

臘月滁州始覺寒
年豐歲暮郡齋閒
官供好酒何憂雪
天與新詩合看山
日照野塘梅欲綻
燒迴荒徑草猶斑
吏人散後無公事
門戟森森夕鳥還

有傷

壁上時碑僅書夜
案頭朝報見存亡
懸車又喪司空相

延閣新薨賈侍郎

二公相繼薨

陶鑄官資經化筆

某登朝後所任官皆

司空在中書

品題名姓在文場

予應舉時賈公以駕部員外知制誥同知貢舉遂蒙首冠

多總帷一慟無由得徒灑春風淚數行

寄杭州昭慶寺華嚴社主省常上人

夢幻吾身是偶然勞生四十又三年任誇西掖吟紅藥
何似東林種白蓮入定雪龕燈焰直講經霜殿磬聲圓
謫官不得餘杭郡空寄高僧結社篇

詩酒

白頭郎吏合歸耕猶戀君恩典郡城已覺功名乖素志
祇憑詩酒送浮生剛腸減後微微諷病眼昏來細細傾
樽杓不空編集滿未能將此換公卿

贈朱巖

未得科名鬢已衰年年憔悴在京師妻裝秋卷停燈坐
兒趁朝食乞米炊尚對交朋賒酒飲徧看卿相借驢騎
誰憐所好還同我韓柳文章李杜詩

巖妻能書

戲和詩州曾秘丞黃黃詩

黃黃真是小巫娥買恐千金價不多別母語嬌空有淚
對人聲顫未成歌產從南國勝桃李攜去東山隱薜蘿
滌上老郎無妓女草玄讀易擬如何

和朱巖留別依本韻

之子有文行常流竊比難揮毫秋露下

生文學餘力尤工篆隸

開

卷古風寒塲屋推盟主聲詩立將壇論儒輕五伯議古

嫉三桓師仰惟韓愈才名壓李觀

生有師韓說

固窮多短褐

憂道即忘餐見訪山園郡相逢菊滿欄眼青憐造士頭

白愧郎官罷舉層霄遠
監州勺水蟠貧厨
兼味少市醞
數杯酸舊業
煩君勘新題
為我刊
生為余刊小畜集
又書八絕詩於石
臨
岐留雅什
天馬撼金鑾

歲暮感懷

歲暮山城放逐臣
老從霄漢委泥塵
公卿別後全無信
兄弟書來祇說貧
眼看青山休未得
鬢垂華髮摘空頻
文章氣槩成何事
霑惹虛名誤此身

茶園十二韻

勤王修歲貢晚駕過郊原蔽芾餘千本青葱共一園牙

新撐老葉

新牙之上去年舊葉尚在

土軟迸新根舌小伴黃雀毛獐

摘綠猿出蒸香更別入焙火微溫採近桐華節生無穀
雨痕緘滕防遠道進獻趨頭番待破華胥夢先經閭闔
門汲泉鳴玉爇開宴壓瑤樽茂育知天意甄收荷主恩
沃心同直諫苦口類嘉言未復金鑾召年年奉至尊

寒食

寒食江都郡青旗賣楚醪樓臺藏綠柳籬落露紅桃妓

女穿輕屐笙歌泛小舫使君慵不出愁坐讀離騷

牡丹十六韻

艷絕百花慙花中合面南賦詩情莫倦中酒病先甘國
色渾無對天香亦不堪遮須施錦帳戴好上瑤簪苞拆
深擎露枝拖翠出藍半傾留粉蝶微亞摘宜男鄰妓臨
粧妬胡蜂得蓋貪忽行晴吹動濃睡曉烟含話別年經
一相逢月又三遣誰擣白髮為爾換新衫池館邀賓看
衙庭放吏叅仙娥喧道院魔女逼禪庵

道院禪庵皆
公署內所有亂

折窠難惜分題韻更探歌歡殊未厭零落痛曾諳穀雨
供湯沐黃鸝助笑談顏生如見此未免也醺酣

顏回不飲酒

芍藥開花憶牡丹

風雨無情落牡丹翻階紅藥滿朱欄明皇幸蜀楊妃死
縱有嬪嬙不喜看

海仙花詩 并序

海仙花者世謂之錦帶維揚人傳云初得于海州山
谷間其枝長而花密若錦帶然其花未開如海棠既

開如木瓜而繁麗婀娜過之一朶滿頭冠不克荷惜
其不香而無子第可鈎壓其條移植他所因以釋草
釋木驗之皆無有也近之好事者作花譜以海棠為
花中神仙子謂此花不在海棠下宜以仙為號目之
錦帶俚孰甚焉又取始得之地名曰海仙且賦詩三
章以存其名題諸僧壁

一堆絳雪壓春叢
嫋嫋長條弄晚風
借問開時何所似
似將綉被覆薰籠

春憎窈窕教無子天為妖嬈不與香盡日含毫難並比
花中應是衛莊姜

何年移植在僧家一簇柔條綴綵霞錦帶為名俚且俗
為君呼作海仙花

后土廟瓊花詩二首

并序

揚州后土廟有花一株潔白可愛且其樹大而花繁
不知實何木也俗謂之瓊花云因賦詩以狀其態

誰移琪樹下仙鄉二月輕冰八月霜若使壽陽公主在

自當羞見落梅粧

春冰薄薄壓枝柯分與清香是月娥
忽似暑天深澗底
老松擎雪白婆娑

芍藥詩 并序

芍藥之義見於鄭風百花之中其名最古謝公入直
中書省詩云紅藥當階翻自後詞臣引為故事白少
傅為主客郎中知制誥有草詞畢詠芍藥詩詞彩甚
為該備然自天后以來牡丹始盛而芍藥之艷衰矣

考其實牡丹初號木芍藥蓋本同而未異也予以端
拱己丑歲由左司諫為制誥舍人後坐事黜棄淳化
甲午年又以禮部員外郎牽復舊職尋以本官充翰
林學士則謝公白傳之任皆蹂躪矣自出滁上移廣
陵追念綸闈于今九載而編集之內未嘗有芍藥詩
言于詞臣不得無過揚州僧舍植數千本牡丹落時
繁艷可愛因賦詩三章書于僧壁

牡丹落盡正淒涼紅藥開時醉一場羽客諳傳尸解術

仙家重熟返魂香蜂尋檀口論前事露濕紅英試曉粧
曾忝掖垣真舊物多情應認紫薇郎

東君留着占殘春得得遲開亦有因曾與掖垣留故事
又來淮海伴詞臣日燒紅艷排千朶風遞清香滿四鄰
更愛綠頭弄金縷異時相對掌絲綸

滿院勻開似赤城帝鄉齊點上元燈感傷綸閣多情客
珍重維揚好事僧酌處酒杯深蘸甲折來花朶細含稜
老郎為郡辜朝寄除却吟詩百不能

暮春

索寞紅芳又一年，老郎空解惜春殘。
纔聞鶯囀誇楊柳，已被蟬聲哭牡丹。
壯志休磨三尺劍，白頭誰藉兩梁冠。
酒樽何必勞人勸，且折餘花更盡歡。

贈呂通秘丞

楚州
監倉

聞君公事苦喧卑，紅粟堆邊獨斂眉。
已入朝行翻掌度，未如畿尉且吟詩。
君前任
畿尉堰頭笑傲同張祜，市裏優游
比路隨。惟有才名藏不得，山陽留滯
官多時。

贈省欽師

師善八分書太宗召于
殿上書數行得賜紫衣

舊隱何年別翠微
瀑泉聲外鎖禪扉
御前曾寫八分字
天上還宣三事衣
燈照夜菴霜後冷
鼎烹秋菌雨中肥
終歸五老峰邊去
杯渡長江一錫飛

送宋澥處士之長安

簪笏盈門獨紉蘭
卧龍潛在八龍間
鴿原任說朝賢貴
鶴氅惟稱處士閒
靜按仙經燒大藥
狂挨僧壁畫遙山
老郎見說歸休計
分取圭峰並掩關

贈狀元先輩孫僅

病中何事忽開顏
記得詩稱小狀元

予淳化辛卯歲贈君詩云明年再就

堯階試應被
人呼小狀元

粉壁乍懸龍虎榜
錦標終屬鶴鴿原
青雲

隨步登花塔
紅雪飄衣醉杏園
還有一條遺恨處
不教

英俊在吾門

贈浚儀朱學士

潘岳花陰覆杏壇
門生叅謁絳紗寬
西垣久望神仙侶
北部休誇父母官
雨屐送僧莎徑滑
夜棋留客竹齋寒

何時僦直來相繼三入承明興漸闌

青猿

小僕如猿狖貧家備指呼未堪隨馬足已慣典魚須時
洗塵侵硯閒收雨滴圖歸田如有計留負酒胡蘆

頃年謫官解梁收得令狐補闕毛詩音義其本乃
會昌三年所寫數行殘闕後人添之其筆跡乃
工部畢侍郎所補也昨因問之乃云亡失多年
矣作四韻以還之

謫宦山州自訓童因求書籍有遭逢偶收毛鄭古詩義

認得歐虞舊筆蹤南郡攜行心不足

此本自解梁徵迴便合納上尋值侍

卽入聖上幕府不敢私謁遂攜去滁揚二州

西齋送去手親封塵侵煙染尤

堪重年號標題歷武宗

伏日偶作

移牀施簟就南軒門掩閒坊半樹蟬多病形容只有骨
食貧生計旋無錢掖垣已忝年深直朝謁終妨日晏眠
會解綸闈求郡印早收餘俸卜歸田

贈密直張諫議

先皇憂蜀輟樞臣獨冒兵戈出劔門萬里辭家堪下淚
四年歸闕似還魂弟兄次序元投分兒女情親又結婚
且喜相逢開口笑甘陳功業不須論

送第三人朱巖先輩從事和州

賃船東下歷陽湖榜眼科名釋褐初賓職不憂無厚俸
郡齋惟喜有藏書伴吟先買秋江雀醒酒時烹晚市魚
廉使多情應問我為言衰病似相如

對雪示嘉祐

去年看雪在商州使君命我山寺頭
峰巒草樹六百里
饑飈凍鳥聲啾啾
山城窮陋無妓樂
何以銷得騷人愁
抱甌自瀉不待勸
乘興一引連十甌
晚歸上馬頗自適
狂吟醉舞夜不休
今年看雪在帝里
瑤臺瓊樹佳氣浮
朝回攬轡聊四望
移下五城十二樓
樽中有酒翻不飲
鬱鬱不快非怨尤
吾兒嬌駮未曉事
問我胡不私獻酬
因令把筆寫我意
為渠吟作雪中謳
昔為副使不理事

待罪且免憂人憂今為諫官非冗長拾遺三館俸入優
秋來連澍百日雨禾黍飄溺多不收如今行潦占南畝
農夫失望無來麩爾看門外饑餓者往往殍殍填渠溝
峩冠旅進又旅退曾無一事裨皇猷俸錢一月數家賦
朝衣一襲幾人裘安邊不學趙充國富民不作田千秋
胡為碌碌事文筆謫時頌聖如俳優一家衣食仰在我
縱得飽暖如狗偷况我眼昏頭漸白安能隱几勤校讐
何時提汝歸田去賣馬可易數隻牛深耕淺種苟自給

藜羹豆粥充饑喉黍畦鋤理學元亮瓜田澆灌師秦侯
素飧免作疲人蠹開卷免對古人羞未行此志吾戚戚
對酒不飲抑有由斯言不敢向人道語爾小子為貽謀
送晁監丞赴婺州關市之役

關征市賦縻賢俊誰愛此官為吏隱將作晁丞于役時
婺女星臨海邊郡黃絹辭高位尚卑白華行潔身猶困
會待時來即併伸也知道在終無悶君不見路隨含笑
坐市中屈身豈愧丹陽尹又不見張生狂醉戀揚州冬

瓜堰下甘肥遯此行况是奉皇華數丈輕舸載一家攜
餅下岸買竹葉挂席背風穿蓼花霜晴震澤初嘗橘泉
過惠山應試茶虎丘曉露靈隱雪錢塘夜潮照湖月密
排詩景在途中旋吟新句教兒童漸近金華見隼旗五
馬來迎使者車應知驥足暫拘絆八詠樓開頻啓宴醉
中官妓乞謔詩剡溪紙貴抄新詞他年誰獻子虛賦召
入金門五雲路因思元白在江東不似晁丞今獨步

還揚州許書記家集

許渾孫進
家集得官

君不見近代詩家流胡為蹇滯多窮愁孟郊憔悴死逆
旅浪仙斥逐長江頭張生飄泊冬瓜堰徒云輕薄萬戶
侯浩然無成鹿門去李恫慟哭昭陵休生無風教興王
化死無勲爵貽孫謀可憐詩道日已替風騷委地何人
收高陽許公精六義獨向聖朝生後嗣因將先集進九
重高步金臺曳珠履祖德光輝聖主知府尹賢明丞相
子時維揚權牧即
故中令薛相子廣陵郡大古九州記室官清外三事
遂令天下學詩人徒羨君家窮四始我來迎侍遊江都

玳筵往往陪歡娛
遂求家集恣吟諷
海波乾處堆珊瑚
因思賈孟數家一
何苦詩鬼嗷嗷餒
無主子孫淪沒誰
及君閒倚紅蓮傾
綠醕草檄餘閒好
賦詩莫放風情忝
爾祖

酬處才上人

我聞三代淳且質
誰人熙熙誰信佛
茹蔬剃髮在西戎
梵法不敢干華風
周家子孫胡不肖
奢淫昏亂墮王道
秦皇漢帝又雜伯
只以威刑取天下
蒼生哀苦不自知

從此中國羨西陲無端更作金人夢萬里迎來萬民重
為君為相猶皈依咄咄聾俗誰敢非若教却似周公時
生民豈肯顧披緇可憐嗷嗷避征役半入金田不耕織
君子之道動即窮亦有賢達藏其中上人來自九華山
叩門遺我瓊瑤編錚錚五軸餘百篇定交仍以書為先
書中不說經文中不言佛有心直欲興文物感師自遠
來相親為師畫卦成同人出門无咎非羣分袞袞墨綬
何足云

和馮中允爐邊偶作

誰為東君掌青律故將春日連人日春日雨絲暖融融
人日雪花寒慄慄雨雪寒暖苦不同可比交情去就中
仲咸擁爐發歌詠古風激破澆漓風人情離合古來有
召公初亦疑周公汾陽臨淮本仇隙一旦分兵若親戚
四公翻覆人不譏各各操心為邦國此外壽張多為已
反掌背面如千里張耳陳餘不忍言魏其武安何足齒
我愛中允君子心心與人交淡如水別有人間勢利徒

一去一就隨榮枯西漢董賢方佞倖孔光迎拜卑如奴
是時楊雄在東觀投閣欲死無人扶有唐力士夫人死
朝士執喪平聲如喪妣是時李白放江邊憔悴無人供酒
錢小人之性何所似真如蜂蝶并螻蟻尋香逐臭苟朝
昏豈願松篁與蘭茝重君誓心一何極澗底松兮陵上
栢澗松陵栢有朽時我約君心無改易

烏啄瘡驢歌

商山老烏何慘酷啄長干釘利于鏃拾蟲啄卵從爾為

安得殘我負瘡畜我從去歲謫商於行李惟存一蹇驢
來登秦嶺又巉岩為我馱背百卷書穿皮露脊痕連腹
半年治療將平復老鳥昨日忽下來啄破舊瘡取新肉
驢號僕叫鳥已飛劇背振毛坐吾屋我驢我僕奈爾何
悔不挾彈更張羅賴是商山多鷲鳥便問鄰家借秋鷄
鉄爾拳兮鈎爾爪折鳥頸兮食鳥腦豈惟取爾饑腸飽
亦與瘡驢復仇了

拍板謠

麻姑親採扶桑木，鏤脆排焦其數六。雙成捧出玉母前，
曾按瑤池白雲曲。幾時流落來人間，梨園部中齊管絃。
管絃纔動我能應，知音審樂功何全。吳宮女兒手如筍，
執向玳筵為樂準。數聲慢，仙人屐齒下雲棧。老狐臘月
渡黃河，緩步輕輕踏冰片。數聲急，空江電打漁翁笠。鮫
人泣對水精盤，滿把珠璣連瀉入。劃然一聲送曲徹，由
基射透七重札。金壘冷落間，無聞隴頭凍。把泉聲絕律
呂與我數，自齊絲竹望我為宗師。總驅節奏在術內，歌

舞之人無我欺所以唐相牛僧孺為文命之為樂句

筵上狂歌送侍棊衣襖天使

昔事先皇叨近侍北門西掖清華地太宗多材復多藝
萬幾餘暇翻棊勢對面千里為第一獨飛天蛾為第二
第三海底取明珠三陣堂堂皆御製中侍宣來示近臣
天機秘密通鬼神乃知棊法同軍法既戒貪心又嫌怯
惟宜靜勝守封疆不樂窮兵用戈甲先皇三勢有深旨
豈獨一枰而已矣當時受賜感君恩藏于篋笥傳子孫

至道年中出滁上失脚青雲空悵望移典維揚日望還
軒轅鼎成飛上天龍髯忽斷攀不得舊朝衣上淚潺湲
吾皇曲念先朝物徵歸再掌西垣筆悲涼忽見紅藥開
哭臨空隨梓宮出去年領郡得齊安山州僻陋在江干
黃民誰識舊學士白頭猶作老郎官昨日江邊天使到
隨例霑恩着衣襖皇華本是江南客久侍先皇對棊奕
筵中偶說當年事三勢分明皆記得我從失職別上臺
御書深鎖不將來遙想棊圖在私室天香散盡空塵埃

今日因君聊話及翻作停杯向隅泣人生不易逢聖朝
君恩未報雙鬢凋金鑾殿花春灼灼永熙陵樹夜蕭蕭
空嘆拖腸在泥土不如舐鼎升烟霄多病相如猶未死
追思往事欲魂消星使今辰回馬首強對離筵滿傾酒
悲歌一曲從事書唱與朝中舊知友


還楊遂蜀中集

上玄茫昧胡為乎施設吾道生吾徒否多泰少是天意
生有述作死不虛聖人憂患方演易賢者窮愁始著書

盡令富貴陷逸樂蠢蠢戢戢如雞猪泯然無物作時瑞
誰識鳳凰與騶虞經史子集燦今古粉繪帝道張皇謨
一言可採即不朽名姓長與日月俱乃知天心厚我輩
窮辱不足形悲吁夫君擢秀在江左國小而逼何區區
科名始得值兵火金陵坐見成丘墟歸朝纔得一贊善
黜降重為縣大夫彰明僻遠在蜀道又遇妖賊攻成都
徒行抱印入隴氏乞食村落何崎嶇歸來朝請作主簿
朱衣暗淡髭毛疎昨朝投我蜀中作錚然一集如瓊琚

杜甫悲竄吟不輟庾信悲哀情有餘我逢聖代自多難
謾誇三入承明廬近令編綴小畜集文筆詩賦何紛如
才名官職不兩立真宰折刻分毫銖郎官疎遠既未貴
縣吏禮數不足拘相逢且說文章樂為君酌酒焚枯魚

宋詩鈔卷一



總校官庶吉士 臣張能照

校對官助教 臣金學詩

謄錄監生 臣觀音保